

Aprés doit l'en regarder comment l'en doit faire ammosne et la maniere du donner. Et pour ce quatre condicions selonc l'Escripture doivent estre en ammosne;

La premiere est que l'en doinst lielement et de cuer. Car Diex regarde plus le cuer que les . . .⁴ dont saint Gregoire dit que Diex en son sacrefice ne regarde comme grant chose l'en donne, mes de quel cuer. Comme il apert bien en l'Evangille de la povre fame qui n'avoit que deus poitevines que elle offri au temple, dont nostre Sires dist que elle y avoit plus mis que tuit li autre qui y avoient mis grans choses. Car plus plest a Dieu aucune foiz un maille que un povre home donne liement por Dieu que se uns riches donnoit cent mars en rechignant ou en tristeece de cuer. Et pour ce dit li Sages en l'Escripture, "Fai," dist il, "belle chiere et liee en tous tes dons."⁵ Et saint Pol si dit que Diex aime moult donneur qui est liez et courtoiz. Il sont aucunes gens si villains aus povres quant il leur demandent ammosnes que tantost leur respondent moult vilainement; il les appellent truans et leur dient tant de reproches et de felonnies avant que il leur donnent rien qui bien vaut l'argent. Tels ammosne ne plest pas a Dieu, et pour ce dit li Sages en l'Escripture, "Encline t'oreille au povre sanz tristeece et li respons debonnairement."⁶

La seconde chose que il convient en ammosne est que

l'en face hastivement et tost. Dont Salomon dit, "Ne di pas au povre, 'Va et revien demain, et lors je te donray,' quant tu li pues tantost donner."⁷ Et en autre lieu dit il, "N'es loingne pas ton don au souffraiteus,"⁸ c'est a dire, ne le fai pas attendre quant tu li pues tantost donner. C'est contre moult de riches homes qui font tant crier les povres, qui ont a faire d'euls et tant de fois les delaient et tant les convient prier et requerre avant que il vueillent riens faire, que trop leur vendent ce que il leur font. Car si comme dit Seneques, nulle chose n'est si chier achetee comme celle que l'en a par priere; c'est le proverbe que l'en dit, "Trop achete qui demande." Aussi doit chascuns hastivement bien faire pour s'ame, tant comme il est vis et sains. Dont li Sages dit en l'Escripture, "Biaus fils," dist il, "fai bien se tu as de quoi et offre a Dieu dignes offrandes tant comme tu vis, que la mort ne tardera mie."⁹ Et en autre lieu dit il, "Fai bien a ton ami devant la mort,"¹⁰ c'est a ton esperit a qui tu doiz bien faire avant ta mort, ou tes amis loyaus, c'est Jhesucrist, a qui tu doiz bien faire avant en faisant anmosnes pour l'amour de li a ses povres. Car ce que l'en aus povres, l'en fait a li, si comme il dit en l'Evangille. Dont l'anmosne que l'en donne en sa vie et en sa santé vaut miex que celle qui est faite après la mort; aussi comme la lanterne que l'en porte pardevant l'ome conduit miex et plus

seurement que celle que l'en li porte parderriere le dos.
 Et pour ce nous ammonneste saint Pol, que nous facons le bien
 tant comme nous avons le temps que Diex nous a presté. Quant
 un riche doit venir en une ville ou en une cité il envoie les
 messages devant pour avoir bon hostel; autrement il porroit
 bien faillir a avoir bon ostel. Dont li bon fourrier qui
 prennent et appareillent l'ostel aus riches hommes sont les
 anmosnes qui sont faites après la mort et sont aussi comme le
 serjant recreu qui tart vient a ostel et que li sires est au-
 cune fois mal¹¹ herbegiez.

La tierce condicion qui doit estre en anmosne est que
 l'en doit donner largement selonc ce que l'en a. Dont li
 Sages dit, "Donne a Dieu selonc ce que il te donne." Et Thobie
 dit ainsi, "Selonc ton povoir soies piteus et misericors; se
 tu as moult de biens, si donne largement; se tu as petit, de
 petit donne volentiers et courtoisement."¹² Dont chascuns doit
 donner selonc son estat et selonc ce que Diex li a donné. L'en
 trueve d'un roy a qui un povre home demanda un denier, qui li
 respondi que si petit don n'aferoit pas a roy. Et d'Alixan-
 dre list l'en que il donna une cité a un serjant, et cil si la
 volt refuser, pour ce que grant chose li sambloit de prendre
 tel don. Alixandre li dist, "Je ne regarde pas que il affiert
 a toi a prendre, mes a moi a donner."

La quarte condicion est que l'anmosne soit faite ou de

humilité ou devotion, si que l'en ne quiere point de vaine gloire, ne que l'en ne despise le povre a qui l'en donne, ne que pour aumosne que l'en face en pechié mortel n'en ait presumption d'estre sauvez. Il sont aucunes gens, se il font aumosnes il vuelent que chascun le sache. Mes li Sages dit, "Que l'en mette l'aumosne ou sain au povre." Car , si comme dit saint Grigoire, il souffist au preudome que cil la voie de qui il attent son loier pour ce dit nostre Sires en l'Evangille, "Quant tu feras," dist il, "amosne, ne sache ta senestre que fait ta destre, si que t'anmosne soit en repos; et ton pere des ciex qui voit en repost la te rendre."¹³ C'est a dire que quant tu feras anmosne, garde que vaine gloire qui est entendue par la senestre n'y soit mellee, mes fai la par droite entention qui est entendue par la destre. Je ne di pas que l'en ne doie faire aucune fois en apert devant les gens pour donner bonne example dont Diex soit loez. Car ainsi le dit nostre Sires en l'Evangille que nous façons nos bonnes¹⁴ devant les gens pour ce que Diex en soit loez et glorefiez, non mie par le los des gens comme font li ypocrite. Li serjans bons et loyaus ne doit mie avoir honte de servir son seigneur devant les gens pour li honourer. Dont nostre Sires dit en l'Evangille, "Qui aura," dit il, "honte de moi devant les gens j'aurai honte de li devant les anges,"¹⁵ C'est bien contre ceus qui lessent le bien a faire en apert pour ce que il ne

soient tenus a ypoerites. Et pour ce dit saint Grigoire que l'en face si les oevres en apert, que l'entencion soit droite pardedens. Aprés, qui veut faire anmosne, il la doit faire que il ne despise le povre a qui l'en la fait, pour ce dit le prophetes, "Ne despi pas," dit il, "ta char," c'est le povre qui est samblabe a toi et d'autele matiere de char et de sanc comme tu es, et d'autel boe. Il sont aucunes gens qui despisent les povres et ne deignent parler a euls; et se il y parlent, si parlent il si orgueilleusement. Ainsi ne faisoit pas Job qui disoit que il ne despisoit onques les trespassans pour ce que il fussent nus; ancoiz leur donnoit a vestir et a mengier. Li sains homs, ja soit ce que il fust roys et grant, n'avoit pas honte des povres comme dient aucuns grans seigneurs de cest monde qui bien font anmosne aus povres mes toutes voies les ont il en despit pour leur povrete. Et se il fussent droitemeument humbles, il amassent miex la compaignie des preudomes qui sont povres pour Dieu, qui les pueent bien edefier par essamples et par paroles. Et si sont moult de riches qui ont entour euls de tels ou il n'a fors flateries et couvoitise et vanité, et leur font moult de maus faire pour leurs mauvés conseul et leur font moult de bien lessier a faire. Aprés, il sont aucunes gens qui font moult d'aumosnes mes toutes voies ne lessent il pas les grans pechiez a faire teles anmosnes, ne les sauveront pas. Car se il moroient en tel estat ja

leurs ammosnes ne les garderoient d'estre dampnez, dont tels gens sont aussi comme cil qui edefioit sa meson d'une part et la depeçoit d'autre. Et pour ce dit l'Escripture, "Se tu veus plaire a Dieu, aies premierement pitié et merci de t'ame." "Car qui est mauvés a soi a qui sera il bon et loyal?" dit l'Escripture aussi comme se elle defist, "ne puet estre bon ne loyal a un autre¹⁶ qui est mauvés et desloyaus a soi." Et pour ce dit saint Augustin, "Qui veut ordeneement faire ammosne il doit avant commencier a soi, car il doit plus amer s'ame que autrui fors Dieu." Nuls ne diroit que cil fust piteus ne misericors qui n'auroit pitié de sa mere povre et malade combien que il eüst pitié des autres. Aussi ne di je mie que cil soit piteus ne misericors qui n'a pitié de s'ame quant il set que elle est malade a mort, c'est en pechié mortel.

Ore t'ai je assez moustré de l'arbre de misericorde, les degrez et les branches et le fruit qui en vient en cest siecle et en l'autre. Du fruit de cest arbre nous parle trop bien David ou Sautier ou il dit ainsi: "Boneüré sont cil qui entendent aus povres et aus souffraiteus";¹⁷ c'est a dire qui n'atendent mie que l'en leur demant, ancoiz le donnent sanz demander. Car l'en seut dire et voirs est que trop achate qui demande, et cil n'a pas cuer de donner qui ne donne sanz demander. Cil fait bien qui donne au povre qui demande, mes cil fait miex qui donne au povre sanz demander. Et de celui

dit le Sautier, "Boneüré est cil qui entent au povre." Et pour quoi il est boneüré? Il le dit après en ce meisme vers que Diex se deliverra ou mal jour de ses anemis. Ce sera au jour du jugement qui sera durs et maus aus mauvés qui seront dampnez pour les oevres de misericorde que il n'auront pas faites. Dont li juges leur dira, "Alez le maleoit ou feu d'enfer avec les dyables, car quant j'oi fain et soif, vous ne me donnastes pas a mengier ne a boire; je fui malades et vous ne me visitastes pas."¹⁸ Et leur reprochera ainsi les oevres de misericorde que il n'aront pas faites; et pour ce seront livrez a leurs anemis, ce sera aus dyables d'enfer des quels les piteus et cil qui entendent aus povres seront delivrés. Et celui jour seront mis en possession du royaume du ciel, si comme dit nostre Sires en l'Evangille. Car il dira a ceuls qui aront fait les oevres de misericorde: "Venez le benoit de mon Pere et recevez le royaume du ciel que je vous ai appareillié dès le commencement du monde. Car ce que vous avez fait aus povres vous avez fait a moi."¹⁹ Grant honneur leur fera Diex quant il les merciera des oevres de misericorde et leur donra la vie pardurable. Et pour ce dit il en l'Evangille, "Boneürez sont les misericors car il auront misericorde,"²⁰ pour ce que il auront aloingniee la vie aus povres par leurs anmosnes; bien est drois et reson que Diex leur doinst longue vie, c'est la vie pardurable qui est sanz fin. Et pour ce que il ont eü

pitié des membres Jhesucrist en terre et les ont reconfortez
et soustenus en leurs tribulations et adversitez, bien est
drois et reson que en la fin il leur face misericorde, et que
il les delivre de toutes adversitez et de toute misere. Et
ce fera il quant il leur donra la gloire pardurable ou miseri-
corde les conduire et herbergera.

DE LA VIE ACTIVE ET CONTEMPLATIVE

La sainte Escripture nous enseigne deus manieres de vies par quoi l'en vient a la vie pardurable. La premiers est appelee active pour ce que elle est en labour de bonnes oevres et fait l'omme entendre au profit de soi et de son profisme. La seconde est appelee contemplative pour ce que elle est en repos des oevres pardehors et n'entent fors a Dieu cognoistre et amer. Dont elle est oiseuse des oevres pardehors et aussi comme endormie, mes elle est esveilliee pardedens a penser a Dieu et a li amer. Et pour li toutes autres choses il met en oubli, si que elle est du tout ravie et fichiee en Dieu, et desirre estre dessevree du cors mortel pour estre tous jours avec Jhesucrist, si comme dit saint Pol.

La premiere bataille est ou champ des bonnes oevres ou li chevalier Dieu s'espruevent et alosent. La seconde se repose avec Dieu en la chambre de droite conscience. La premiere entent a pestre Dieu de la viande des bonnes oevres. La seconde entent a estre peue et saoulee de Dieu par vrai confort espirituel. Dont la premiere est senefiee par Marthe qui estoit curieuse de nostre Seigneur pestre, si comme dit l'Evangille, la seconde est senefiee par Marie qui se seoit aus piez Jhesucrist et escoutoit ses paroles. La premiere est voie et entree a la seconde, car nuls ne puet venir a la vie contemplative se il n'est premierement esprouvez en la vie active, si comme dit saint Grigoire. Les dons et les vertus dont nous avons parle

dessus appartiennent en la premiere vie qui est appelee active. Li dui derrenier don dont nous devons parler a l'aide du Saint Esperit, c'est assavoir le don d'entendement et le don de sapience appartiennent a la seconde vie qui est appelee contemplative. Ceste vie est en deus choses si comme nous avons dessus touchié, c'est assavoir en droite cognoissance de Dieu et en parfaite amour. Li don d'entendement mainent a perfection de droite cognoissance. Le don de sapience maine a perfection d'amour.

Ore dirons dont premierement du don d'entendement et selonc ce que li Sains Esperis nous enseignera. Cils dons qui estappelez le don d'entendement n'est autre chose, selonc les sains et les mestres, fors une lumiere et une clarté de grace que li Sains Esperis envoie en cuer, par quoi entendement d'omme est eslevez a cognoistre son Createur et les choses espirituels qui ne pueent estre veües corporelment, et toutes les choses qui appartiennent au salut de l'ame, ou reson naturele ou entendement d'omme de soi ne par soi ne puet venir. Cils don est appelez lumiere, car il purge l'entendement d'omme des tenebres d'ignorance et des taches de pechié. Car aussi comme la lumiere corporele oste les tenebres et fait clerement vecir les choses corporeles, aussi ceste lumiere espirituelle purge l'entendement d'omme en ce que il puisse cognoistre en ceste vie mortel Dieu son Createur et les creatures

espirituëles et les choses qui appartiennent au salut de l'ame. Ce sont les articles dont nous avons parlé pieça, qui sont de la foy en un tretié tout par soi.

Ceste cognoissance n'est fors en conscience bien purgée et bien nete, et aussi comme l'ueil malade ou chacieus ne puet pas bien regarder la clarté,¹ aussi li entendemens d'omme quant est de soi ne puet regarder ne cognoistre les choses espirituëles se il n'est bien purgié de toutes teches d'erreur et droiture ou d'ordure par vraie foy qui purge les cuers, si comme dit l'Escripture. Mes le don du Saint Esperit , dont nous parlons ici, parfait ceste purgation et ceste neteté de cuer en ce que la sainte ame qui est purgée et enluminee de ceste lumiere d'entendement puisse veoir et cognoistre Dieu, et quanque est nécessaire et profitable a son sauvement. Car ce est la bonne oevre dont Diex parle en l'Evangille quant il dit, "Bonneüré sont li net de cuer, car il verront Dieu"² en present par foy enluminee et enforciee par le don d'entendement. Et après, en paradis le verront espirituelment face a face, comme dit saint Pol. Cils drons oste toute ordure de cuer et le netoie parfaitement de toutes teches, et especiaument de la tache de pechié de luxure. Qui de tele teche est entechiez, il est droitement avuglez; il a perdu les yex du cuer, reson et entendement, si que il ne puet entendre ne cognoistre son Createur ne chose qui tourt au salut de s'ame,

mes aussi comme une beste qui n'a ne senz ne reson en soy.
Dont David dit ou Sautier que homs cui Diex a fait si grant honneur, que il l'a fait a symage et a sa samblance par quoi il puet cognoistre Dieu et avoir ce que il n'a fait a nulle beste. Ainsi oublie il son Creatour et la bonté que il li a faite car il est devenus samblabes aus foles bestes qui n'ont point d'entendement.

Li pechiez qui plus fait sambler home a vil beste et a orde est li pechiez de luxure dont nous avons pieça parlé ou Tretié des vices. Li dons³ d'entendement qui est contraires a tele ordure estrepe et errache du cuer le pechié de luxure et y seme neteté et purté dont il n'est un tres bel arbre. C'est la vertu de chaasté par quoi l'en vient a celle boneürté que Diex promet a ceus qui gardent neteté de cuer quant il dit, "Bonentré sont li net de cuer, car il verront Dieu." Pour ce que il auront les yex du cuer bien purgiez et bien enluminez du don d'entendement. Cis arbres monte et avale aussi comme les autres devant dis, par sept degréz.

DES SEPT DEGREZ DE CHASTEE

Le premiers degrez est nete conscience, c'est la racine de cest arbre. Car sanz nete conscience nulle chaasté ne vaut riens. Ceste chastee et cest purté requiert que l'en gart le cuer de mauveses pensees, que il ne s'i consente. Et de mauvés desirriers de son cuer il n'est pas chastes, combien que il se garde du fait, et pour le consentement sanz plus seroit dampnez, se il moroît.

Trois choses valent moult a garder le neteté du cuer.

La premiere est volentiers oîr la parole de Dieu et les sermons. Dont nostre Sires dit en l'Evangille a ses deciples; "Vous este," dit il, "tui nettoie par les paroles que je vous ai dites,"¹ car la parole Dieu est aussi comme un mireoir en quoi l'en voit les teches de son cuer.

La seconde chose est vraie confession qui est le lavoir ou l'en se doit souvent laver. L'Escripture dit ou Livre de roys que Helyes le prophetes commanda a Naaman qui estoit mesel que il se lavast sept fois ou flun Jourdain pour estre netoiez de sa maladie. Et quant il fu illec tous netoiez il fu sains et nés. Li fluns Jourdains, qui vaut autant comme ruissiel de jugement, senefie confession ou l'en se doit jugier a grant doleur de cuer et a grant repentance si que un ruissiel de lermes queûre par le conduit des yex. Ainsi li mesiaus sera gueris et netoiez, c'est li pechierres, se il se lave,² c'est

a dire de tous ses pechiez. Et pour ce dit saint Bernart,
"Aime confession se tu veus avoir biauté."

La tierce chose est ramembrance de la passion Jhesucrist, car nulle temptation ne nulle mauvese pensee ne puet demourer en cuer qui pense et recordre souvent la mort et la passion de Jhesucrist. Car ce est l'armeture que li dyables crient plus comme celle par la quele il fu vaincus et perdi son povoar. Ce nous est trop bien senefié en l'Escripture ou serpent d'arain que Moyses, par le commandement de nostre Seigneur, esdreça si haut en la perche que tout le pueple le vit, et tuit cil qui le regardoient estoient gueris des pointures des serpens. Li serpens d'arain pendus en la perche senefie le cors Jhesucrist qui fu pendus en la croiz. Ce fu li serpens sans venin de quoi fu fait le triacle de nostre salut. Quiconques se sent ferus ne envenimez des pointures envenimees des serpens d'enfer, ce sont des dyables, regart par vraie foy au serpent d'arain, c'est a dire que il li souvieigne de la mort de Jhesucrist, et tantost sera gueris et delivrez des temptacions au dyable.

Le secont degré par ou cest arbre croist et profite si est garder la bouche de vilaines paroles qui tournent a ribaudié et a deshonesté, car par tel soufflet et par tel vent est souvent avivez le feu de luxure. Dont l'Escripture dit que la parole de fole fame est ardant comme feu, et saint Pol si dit

que les mauveses paroles corrumpent les bonnes meurs. Et pour ce qui veut garder chaste il convient que il se gart de telles paroles. Et qui volentiers les dit et volentiers les escoute, il moustre bien que il n'est pas chastes, car il ne puet issir du vessiel fors ce qui y est. Telles paroles sontordes et vilaines et c'est appert signe que l'ordure et la vilennie est en cuer, car de l'abondance du cuer la bouche parle. Ce dit nostre Sires en l'Evangille.

Le tiers degré est bien garder tous les sens de son cors; les yex de fols regars, les oreilles de escouter, les foles paroles, les mains de fols atouchemens, les narilles de trop sci deliter en bonnes viandes et en bonnes saveurs. Ce sont les cinq portes de la cité du cuer ou li dyables entre souvent; ce sont les cinq fenestres de la meson par ou la mort entre souvent ou cuer, comme dit li prophetes. Moult de grans preudes homes ont esté pris et vaincus par ce que il ne gardoient pas bien la porte de chascun senz. Et se tu veus essample, pense que nuls ne fu plus fort de Sanson ne plus saint de David ne plus sage de Salomon, et toutes voies chierent il par fames. Certes, se il sussent bien gardé leur portes li anemis n'eüst pas pris si grans forterescs; car si comme dit saint Grigoire, "La tour du cuer ne puet estre prise se les portes ne sont ouvertes a l'ost au dyable." Dont li ancien phylosophe s'en fuoient es lieus soutains et solitaires et es desers pour ce que il ne peüssent veoir ne oïr ne sentir chose delitable, par

quoi la force de leur cuer s'amoliast ne par quoi il per-
dissent leur chaste; le autre pour ce que il ne fussent em-
peechiez en leur phylosophie de penser, se creverent les yex
pour ce que il ne veſſent chose qui les peult retraire de
leur contemplacion. Dont les roys corporels sont aussi comme
le cheval qui court sans frain, qui trebusche son seigneur.
Mes les cuers chastes les retiennent en frain de reson.

Li quars degrez est asprece de vie mettre la char souz
pié qui est rebelle a l'esperit, si comme dit saint Pol. Car
qui veut estaindre le feu de luxure, il doit oster les alu-
mailles qui norrissent ce feu. Ce sont les delices et les
aises du cors qui embrasent et alument le feu de luxure, et cor-
rumpent chaasté; dont saint Bernart dit que chaasté perist en
delices. L'Escripture dit que li braiers Jeremie porri delez
l'yaue, car chaasté, qui est senefiee pr le braier, perist en
l'yaue de delices. Et pour ce qui se veut garder d'ardoir il
doit oster ses alumailles par abstinence et par aspresce de
cors. Dont l'Escripture dit que li enfant qui furent norri
de grosses viandes et ne vouloient user des viandes delicieuses
furent sauvez en la fournaise de Babilone, par quoi, est enten-
du le pechié de luxure qui est estains par abstinence et par
aspresce. Mes les grasses viandes et les fors fins l'alument
et le norrissent aussi comme sain et gresse alument et enforcent
le feu.

Li quins degréz si est mauvese compaignie et les achoissons de pechié. Moult de gens sont cheüs en pechié par mauvese compaignie que autrement ni fussent pas cheüs. Aussi comme le levain corrond la paste et la tret en sa dueur,³ aussi la mauvese compaignie corrond la bonne renommee de la personne. Une pomme⁴ pourrie entre les saines corrond les autres; se elle y est longuement uns charbons ardans, atost espris le moncel de charbon ou il est mis. Dont le Sautier dit que tu seras sains avec les sains et povres avec les povres, aussi comme se il deüst, "Se tu veus garder ta neteté et ta chaasté, sui la compaignie des bons, car se tu aimes la compaignie aus mauvés tu seras autel comme il sont. Car qui aime compaignie de fol il convient que il soit fol." Ore dit li Sages en l'Es cripture, aussi convient il fuir le choison de pechié, comme par parler priveement a fame et en lieu souspeçonneus et privé et seul a seul, car ce donne souvent⁵ achoison de pechier, especiaument quant l'en a le temps et le lieu. Dont nous lisons ou Livre des Roys que Amon, qui fu fils David, quant il tint sa suer en sa chambree seul a seul, il la corrompi. La dame Joseph quant elle le trouva seul le volt faire pechier a soi, mes il s'en fui comme sages et la lessa. Pour ce dit saint Pol,⁶ "Fuiez fornicacion," c'est a dire les achoisons qui pueent mener a pechié de luxure, car l'en ne puet miex vaincre le pechié de luxure ne garder chaasté que par eschiever compaignie souspeçonneuse et les achoisons. Dont li anges dist

a Loth que il s'en issist hors de la cité de Sodome et de toutes les marches. Car il ne souffrist pas a lessier la mau-
vese compagnie ne le pechié qui ne lesse les marches de pe-
chié. L'en seit dire que tant va li pos a l'yaue que il
brise, et tant va li papeillons entour la flambe que il s'art.
Aussi puet l'en tant querre les achoisons de pechié que l'en
y chiet. Qui se veult dont a droit garder d'ardoir de tel
feu, se doit soingneusement esloignier.

Li sizimes degrez est en besoingniers de bonnes be-
soingnes et honestes. Car li anemis qui ja ne dormira quant
il trueve l'omme oiseus et pereceus de bien faire, il le met
en ses besoingnes et le trebusche legierement en pechié. Dont
l'Escripture dit que oiseuse, c'est a dire negligence et pe-
rece de bien faire, est mestresse d'esmouvoir les maus. Et
pour ce dit saint Pol, "Ne donne pas," dit il, "lieu a l'anemi";⁷
ce est a dire, ne soies pas oiseus que li anemis ne truisse
pas lieu de toi tempter. Pour ce dit saint Grigoires, "Faie
tous jours," dit il, "bonne oevres que li dyables te truisse
tous jours en besoingnie," car cil qui est oyseus ne se puet
tenir que il ne chiee en pechié. Dont li prophetes dit que ce
fu li pechiez de Sodome, que orgueil et plenté de pain et oi-
seuse, c'est a dire, que il bevoient et menjoient et riens ne
faisoient, pour quoi il cheffrent en si vil pechié qui ne fait a
nommer. Aussi font moult de gent qui perdent leur temps et

l'emploient en vanité et en outrage de boire et de mengier et fols jeus et en enfance et en jolivetez de foles chançons de queroles et d'autres deduis. En teles vanitez gastent leur temps et pour ce chieent il moult legierement en moult ors pechiez et souvent ou puis d'enfer. Car si comme dit Job, il mainnent leur vie en joie et en deduit et en delis, et en un seul point descendant en enfer; c'est au point de la mort ou il ne prennent pas garde.

Le septisme degré est devote oroison qui moult vaut a vaincre tous pechiez et meismement le pechié de luxure. Dont saint Grigoire dit que oroison est un moult bon escu contre tous les dars au dyable. Et Ysidoires⁸ dit que c'est le remede contre toutes temptacions de pechié que recorre a l'oroison tant comme li anemis assaut en cuer. Car oroison a coustumee ou acoustamance d'oroison estaint tous les assaus de pechié.

Ore t'ai je dit des sept degrez par ou l'en monte et croist et profite li arbres de chaasté. Ore convient dire des branches de cest arbre qui sont sept selonc sept estas de gens qui sont ou monde.

Li premiers estas est de ceuls qui tous sont enterin de cors et ont gardé leur pucelage. Mes toutes voies ne sont pas liez a ce que il ne puissent estre mariez, et en tel estat doit l'en garder chaasté, c'est neteté de cuer et de cors. Dont les enfans aus riches hommes doivent avoir bonnes gardes et

honnestes, qui les tiennent de prez et qui soient diligent a euls bien enseignier de pechié et de mauveses compaignies. Car les foles compaignies honissent souvent les enfans et leur enseignent mauvés jeus et les paroles de mauvestié et de ribaudie, les fols atouchemens deshonestes par quoi il chieent en pechié de luxure et aucune fois de tele luxure qui est contre nature, de quoi autre fois avons parlé ou Tretié des vices. Et pour ce ne nous convient il pas recorder, car la matiere n'est pas bele. Et pour ce doit l'en les enfans chastier et bien enseignier et tenir de prez tant comme il sont jones, et euls acoustumer a garder les bons enseignemens. Car si comme dit Salomon, "Qu'aprent enfes en sa jonece tenir le veut en sa veillece."⁹ Et li phylosophes dit que ce n'est pas pou de chose d'acoustumer bien ou mal en sa jonece, mes c'est tout; car si comme l'en dit qu'aprent poulain en dontefure tenir le veut tant comme il dure; tel fourme comme li sollers prent au commencement il tient tous jours en tel estat donques. A chaasté mestier de bonne garde car autrement elle seroit tost perdue.

Li secons estas est de ceus qui sont corrumpu de cors et ont leur chaasté perdue et leur pucelage; sanz ce que il fussent onques mariez ne liez de lien qui les peüst empêchier de marier. Et toutes voies sont il confez et repentans de leurs pechiez. En tel estas doit l'en garder chaasté, car cil qui est en tel estat doit avoir ferme propos et volenté, que

jamés ne rencherra en pechié. Ançoiz se gardera a son povoir sanz ce que il se puet marier se il veut. Et cil qui veut en tel estat sa chaasté garder, il convient que il foule et chas- tie sa char par asprece de jeunes et de penitances et de plu- seurs autres bonnes oevres.

Li tiers estas est¹⁰ de ceus qui sont liez par mariage, car il doivent leurs cors li uns a l'autre netement et loyau- ment sanz faire tort, li uns envers l'autre. Et ce requiert la loy de mariage, que li uns port foy et loyauté a l'autre de son cors, car puis que il sont ensamble charnelment il sont un cors et une ame, si comme dit l'Escripture. Et pour ce doit li uns amer l'autre comme soi meffmes, car aussi comme il sont un cors, doivent il estre un cuer par loyal amour. Ne ja ne se doivent deviser ne de cuer ne de cors garder netement et sauve- ment sauve l'ueure de mariage. Et pour ce dit saint Pol que les fames doivent amer leurs seigneurs et honnourer, et doivent estre chastes et sobres en garder leur cors d'autres homes que de leurs seigneurs; sobres en mengier et en boire car trop men- gier et trop boire est grant alumaille au feu de luxure. Aussi doivent les hommes garder leurs cors chastement que il ne s'a- bandonnent a autre fame que a la leur. Mariages est uns estas que l'en doit moult netement et moult chastement et saintement garder pour moult de resons. Car à'est uns estas de grant auctorité que Diex l'establi en paradis terrestre, en l'estat

de innocence avant que homme eüst onques pechié. Et pour ce le doit l'en saintement garder pour la reson et pour l'amour de Dieu qui l'establi et du lieu ou il fu establis. Après c'est uns estas de grant dignité, car Diex volt nestre de fame mariee, c'est de la benoite Vierge Marie. Dont la beneoite Vierge Marie fist de mariage mantel souz qui volt estre con-
ceuz et nés li fils de Dieu. Souz cel mantel fu celez au dya-
blell le sacré et le conseil de nostre raençon et de nostre sa-
lut, pour ce dont le doit l'en honnourer et netement garder pour la saintee. Car c'est un des sacremens de sainte Eglise et senefie le mariage Jhesucrist et la sainte Eglise, entre Dieu et l'ame, dont li estas de mariage est si sains et si hon-
nestes que li fais qui fust pechié mortel sanz mariage est¹² non mie seulement sanz pechié mes puet estre a gaaingnier me-
rite et la vie pardurable. Et doiz savoir que en trois cas l'en puet faire l'uevre de mariage sanz pechié et y puet l'en avoir grant merite quant a l'ame.

Li premiers cas est quant l'en fait tele oevre en enten-
cion d'avoir ligniee a Dieu servir, et en tele entencion fu ma-
riage principaument establi.

Li seconds cas est quant li uns rent a l'autre sa debte quant l'en li requiert et a ce se doit esmouvoir justice qui rent a chascun son droit. Dont quant li uns beel³ a l'autre son droit et refuse quant l'en li demande ou requiert, ou par

bouche ou par signe, comme font les fames qui sont honteuses. a demander tel chose, cil qui refuse tele chose a l'autre peche. Car il fait tort de la seue chose, car li uns a droit ou cors a l'autre. Mes cil qui rent ce que il doit fait bien et a droit quant il le fait en tele entencion, car justice l'esmuet a ce faire, non pas lecherie.

Li tiers cas est quant li homs requiert la fame de tele oevre pour garder la de pechié, meismement quant il voit que elle est si honteuse que elle ne le requeroit jamés de tele chose, et creint que elle ne cheist legierement en pechié, se il ne la requeroit. Qui en tele entencion rent ou requiert tele debte, il ne peche de riens. Ançoiz il puet deservir envers Dieu grant merite, car pitié l'esmuet a ce faire et si n'a en ces trois cas point de pechié en l'uevre de mariage. Mes en autre cas il puet l'en pechier ou venielment ou mortellement et espirituelment en trois cas.

Li premiers est quant l'en requiert en tele oevre fors son delit et sa lecherie, et en tel cas puet l'en pechier venielment et mortelment. Veniaument quant li deliz ne passe mie les bonnes ne les termes de mariage, c'est a dire quant li deliz est si sougiez a reson que cil qui est en tel estat ne voudroit mie tele chose faire fors a sa fame. Mes quant reson y est si avuglee que avant en feroit il se elle n'estoit sa fame, en tel cas est ce pechié mortel. Car tele lecherie passe les

bonnes de mariage dont Diex se courouce souvent a tels gens et donne aucune foiz grant povoir au dyable de euls nuire; si comme l'en dit de Sarre, la fille Raguel, qui fu fame au jone Thobie, qui avoit eü sept maris et furent tuit occis du dyable la premiere nuit que il vouloient gesir a li. Dont li angeles dist a Thobie qui la vouloit avoir a fame, "Je te dirai," dist il, "en queles gens li dyables a povoir -- en ceuls qui mettent Dieu si hors de leurs cuers et de leur pensee que il n'entendent fors a leur lecherie acomplir, aussi comme fait un cheval ou un mulet, et pour ce leur tolt Diex aucune foiz leur fruit que il ne pueent avoir lignié encore."¹⁴ Pueent il pechier mortellement et en autre maniere, c'est a savoir quant li uns traite l'autre contre nature et autrement que nature ne donne ne requiert, ne loy ne mariage. Tel gent pechent plus griement que les autres devant dis. Mes cil qui en leur le povoir nostre Seigneur regardent et leur gardent netement, si comme il est establi, tel gent plesent a Dieu.

Le secont cas ou l'en puet pechier en mariage est quant li homs va a sa fame en temps que il n'i doit mie aler. C'est quant elle est acouchiee d'enfant ou en autre maladie perilleuse. Et cil qui n'espargne sa fame quant elle est en tel estat et il le set, il peche griement, et pour ce que Diex deffent que li homs n'ait compaignie a sa fame en tel estat, si est pour le peril de sa lignié. Car ainsi comme dit saint Jerome, "En tel

estat sont souvent conceü li contrait, li avugle, li clop,
et li mesel." Dont la fame doit bien dire a son seigneur
quant elle est en tel estat que il se sueffre d'estre avec-
ques li, et il s'en doit souffrir tant comme elle soit en tel
point. Aussi s'entre doivent il espargnier de l'uevre de ma-
riage en saint temps comme aus hautes festes sollempnels,
pour miex entendre a Dieu proier. Aussi en celles de jeunes
de sainte Eglise se doit l'en souffrir de tele oevre faire;
non pas pour ce que ce soit pechié de tele oevre faire; non pas
pour ce que ce soit pechié en tel temps -- en tele entencion
le puet l'en faire -- mes aucune fois se doit l'en souffrir
de ce que l'en ne puet faire et loist a faire sanz pechié pour
miex empetrer vers Dieu ce que l'en veut demander, si comme dit
saint Augustin. Après ou temps que la fame est en gesine ou
prés d'enfanter se doit li homs garder de l'uevre de mariage
pour honnesteté et pour le peril qui y puet estre. L'en trueve
ou livre qui parle de la nature des bestes que li olifans n'a-
bitera ja a sa femele tant comme elle est prains. Homs doit
estre par reson plus attrempez que une beste, et pour ce s'en
doit il plus en tel temps souffrir mes toutes voies; ne di je
mie que il peche se il fait l'uevre de mariage en tel temps,
pour bonne cause et en droite entencion dont Diex est juges.

Le tiers cas ou l'en puet griement pechier en sa fame,
c'est en saint lieu. Car es sains lieu comme es moustiers

qui sont appropriez pour Dieu servir et prier, ne doit l'en pas faire l'oevre de mariage pour la reverence du lieu. Et qui ne se garde ne tel lieu de tel oevre faire il peche pour reson du lieu, car tele chose puet estre pechié en un lieu qui n'est pas pechié en un autre.

Le quart estat est de ceus qui ont esté en mariage mes la mort a dessevré l'un de l'autre. Et cil qui est demouré en vie se doit garder chastement tant comme il est en estat de veveté. C'est un estat que saint Pol loe moult et dit aus veves que bon est que elles se tiegnent en tel estat, ~~Et s'e n'e~~ neul'eur plest si se marient, car miex est et plus seüre chose soi marier que soi ardoir. Oil s'art bien qui a pechié se consent, car il met son cuer ou feu de luxure par volenté et par desirrier que il a du feu de luxure. Et miex vaudroit soi marier que soi de tel feu embraser. C'est a dire de ceus qui sont en estat de simple veveté, non mie lié. De ceus qui sont lié en tel estat par veu qui ne se pueent marier sanz pechié mortel après le veu; mes toutes voies, se le veu est simple, c'est a dire quant il est fait pourvetement sanz sollempnité, ja soit ce cil peche mortelment qui après tel veu se marie; toutes voies puet il demourer en son mariage se autres empêchement n'i a, mes il doit faire sa penitance de son veu enfrainct. Mes quant le veu est fait sollempnelment, ou par main de prelat ou par presumption de religion ou par saint ordre, que l'en a voué

en home, soudiacre ou dyacre ou prestre, lors le mariage est nul, ançoiz convient departir. Ceus qui en tel mariage s'assamblient car, il ne pueent estre sauvez en tel estat. A garder l'estat de veveté, doit esmouvoir l'essample de l'auctorité; car si comme il dit ou livre de la nature des bestes, puis que la tourterele a perdu son per ne s'accompagnera a autre, mes tous jors est solitaire et fuit la compagnie des autres. Trois choses sont qui appartiennent moult a ceuls qui sont en veveté.

La premiere est soi repondre et estre pourvedement en son ostel, non pas suivre les compaignies souspeçonneuses. De ce avons nous un essample de Judith qui estoit veve et si estoit moult bele fame; de quoi l'en list en l'Escripture que elle se tenoit en sa chambre enclosee avecques ses puceles. Dont saint Pol reproche les bonnes jones fames veves qui estoient oiseuses et curieuses d'aler et de venir en jengleries et en trop parler; mes closement doivent estre en leur ostel et entendre a bonnes oeuvres faire, si comme saint Pol enseigne.

La second chose si est Dieu prier et estre volentiers au moustier en devotion et en lermes. Comme on list en l'Evangille saint Luc que celle bonne veve qui avoit non Anne que elle ne se partoit du temple et servoit a Dieu jour et nuit.

La tierce chose qui est après, c'est de viande. Car si comme dit saint Pol, la fame veve qui en delices mainne sa vie,

elle est morte par pechié. Car si comme dit saint Bernart, chaasté perist en delices. Tout aussi comme cil perist en l'yaue qui tant est deceuz que il pert la vie se la grace du Saint Esperit, par qui l'ame vit en Dieu, ne le garde. En tel estat aussi appartient il humble habit, non pas orgueilleus ne curieus, dont on list de Judith que elle lessa ses beles robes et ses riches paremens quant son seigneur fu mort, et prist habit de veve simple et humble, qui estoit plus signe de pleur et de doleur que de joie ne de vaine gloire. Et pour ce que elle amoit chasteet et l'avoit gardee toute sa vie; elle vestoit la haire et jeunoit tous les jours fors les festes. Et si estoit elle belle et jone et sage. Mes bonté de cuer et chasteet li fesoit faire. Ainsi doit vivre qui veut garder chasteet en tel estat; c'est la quarte branche de cest arbre.

La quint branche de l'arbre de chasteet si est virginité. Ce est le quint estat de ceuls qui gardent et ont tous gardé et proposent a garder toute leur vie luers cors enterinement sanz corruption et pour l'amour Dieu. Cis estas fait moult a loer pour sa dignité,¹⁵ pour sa biauté, et pour sa bonté. Car tel estat fait celui qui bien le garde estre samblabe aus anges du ciel, si comme dient li saint. Mes tant ont plus li vierge que li angele. Car li angele vivent sanz char, mes li vierge ont victoire de leur char. Et c'est grant merveille que il gardent si foible chastiau comme leur cors contre si fort adversaire

comme est l'anemi qui quiert tous jors les engins que il puet
aprendre tel chastel pour rober le tresor de virginité. C'est
le tresor dont nostre Sires dit en l'Evangille quant il dit
que le royaume du ciel est samblabe au tresor qui est repost
ou champ;¹⁶ c'est la virginité re poste ou cors qui est aussi
comme un champ que l'en doit arrouser par penitance et semer
par labour de bonnes oevres. Dis tresors est samblabe au
royaumes des ciex, car la vie des vierges est samblabe a la
vie du ciel, c'est la vie des anges. Dont nostre Sires dit en
l'Evangille que en la resurrection n'aura point de mariage
comme il a yci, mes il seront comme les anges du ciel. Aprés,
cis estas fait a loer pour sa biauté, car li plus biaus estas
qui soit ou monde, que virginité netement garder. Dont Salomon
dit en soi merveillant ou Livre de sapience; "0," fait il,
"comme est bele chaste et verginité quant elle est clere par
bonne vie et honneste"; aussi comme la clarté fait bel le jour,
aussi la clarté de grace et de bonne vie fait la virginité bele
et plesant a Dieu. Dont saint Jerome dit que moult est bele
et clere devant les autres vertus, virginité, quant elle est
sans teche et sanz ordure de pechié. Car qui est entiers de
cors et de corrupcion il est aussi comme le sepulchre blanchi
qui est bel et blanc pardehors et dedens est tout plain d'oisse-
mens et de mors et de poureture. La virginité est la robe
blanche ou la tache est plus leide et plus apparissant que en

autre robe. Ceste robe doit bien estre gardee de trois choses, de boe, de sanc, et de feu.

La tache de boe si est la couvoitise du monde qui ne doit pas estre ou cuer, qui veult plaire a Dieu en estat de virginité. Car nuls ne puet plaire a Dieu et a son anemi, si comme dit Grigoire. Et cil moustre que il n'est pas amis Dieu qui veut plaire au monde qui est anemis de Dieu. Et saint Pol si dit, "Se je vouloie," fait il, "plere aus gens du monde, je ne seroie pas serjant de Jhesucrist."¹⁷ Un signe qui veut plaire au monde est que le cuer ne soit pas du tout a Dieu et trop grant aournement et curieus atour est environ le cors. Car nuls ne querroit jamés biauté ne curiosité de robe ne de paremens se il ne cuidoit estre vēuz des gens, car qui plus quiert sa biauté pardehors plus pert sa biauté pardedenz, par la quelle l'en doit plaire a Dieu. Dont saint Bernart dit a celles qui quierent les precieuses robes pour plaire au monde et pour moustrer leur biauté et leurs paremens, "Les filles," dit , "de Babilone, c'est de confusion, car leur gloire si leur tourna a confusion et a deshonesté pardurable, se elles ne se gardent; elles se vestent de pourpre et de beles robes precieuses et dessous ces beles robes est souvent la conscience nue et povre. Elles reluisent pardehors de pierres precieuses et de fremaus d'or et d'argent, mes elles sont vils et leides devant Dieu par mauveses meurs." Mes saint Bernart parle de

celles qui ainsi separent par mauveses entention et font plus que leur estat ne requiert. Mes toute la gloire la fille de roy de gloire, si comme dit David, est pardedens en sainte conscience et en bele vertu ou il n'a point de couvoitise fors de plaire a Dieu. Et ainsi la tache de la boe ne l'ordoe point.

Aussi se doit l'en garder en tel estat de la tache du sanc, c'est des pensees et des desiriers charnels. Dont saint Jerome dit que celle virginité est sacrefice en offrande a Jhesucrist qui n'aist en tel pechié en cuer de mauvese pensee ne en char de lecherie, car si comme il meisme dit. Noient nous vaut virginité de cors la ou corrupcion de cuer. Aussi comme le fruit n'est pas bons combien que il soit biaus pardehors, quant il est porri ou vereus pardedens.

Aprés ce doit l'en regarder en cest estat de la tache qui vient du feu de luxure, qui embrase et art souvent la blanche robe de chaasté et de virginité, c'est volentiers dire et escouter paroles qui pueent tourner a pechié. Car aussi comme dit saint Pol et autre foiz l'avons dessus dit, "Les mauveses paroles corrompent les bonnes meurs."¹⁸ Et pour ce dit Seneques, "Garde toi," dist il, "des paroles qui sont deshonestes." Car qui s'i abandonnent il en devient vergoingneus et effrontez, c'est a dire que il en pert la honte et que il en chiet plus legierement en pechié. Et pour ce qui veut

garder nettement le blanche robe de virginité il li convient garder d'escouter et de dire tels paroles ou l'en se puet bruller ou ardoir. Le chat privé se brulle souvent; ce ne fait pas le chat sauvage. Virginité entre les autres vertus est comparee au lis qui est une fleur noble et blanche. Dont nostre Sires dit en l'Escripture par la bouche Salomon, "M'amie est aussi comme le lis entre les espines."¹⁹ La vie espi- rituel nostre Seigneur, c'est l'ame qui garde virginité, car c'est une vertu par quoi l'ame acquiert plus especiaument l'amour de nostre Seigneur. Dont saint Jehan l'evangeliste qui estoit vierge estoit entre les autres apostres plus familiier a nostre Seigneur, et li moustra nostre Sires plus grant signe d'amour et de familiarité, si comme il appert en l'Evan- gile. Et si estoit appelez entre les autres desciples que Jhesucrist l'amoit plus, non pas pour que il n'amast bien les au- tres, mes ce est plus especiaument pour la virginité. Ceste fleur de lis garde sa biauté entre les espines des temptacions de la char, car la char est aussi comme un fumier qui ne port quant est de soi fors que espines ou orties. Ce sont mauvés esmouvement qui souvent poingent l'esperit, mes la fleur de virginité n'a gardé de ces espines quant elle est enracinee en l'amour de Dieu qui la deffent des temptacions. Ceste fleur doit avoir siz fueilles et de trois grains dorez pardedens.

Le premiere fueille est enterineté de cuer et de cors, c'est a dire que le cors soit entier sans corruption de

lecherie. Je di sanz corruption de lecherie car se une vierge estoit corrompue a force et du tout contre sa volenté elle ne la perdroit mie pour le loier de virginité. Et dont saint Luce dist au tyrant; "Se tu me courouces contre ma volenté ma chaasté sera double quant a la couronne de gloire."

La seconde fueille²⁰ est force de cuer, car si comme dit saint Jerome, noient ne vaut avoir virginité de cors qui a volenté de soi marier. Il parle de²¹ celles qui ont voué virginité, car qui a voué a garder virginité orgueilleuse, ne plest point a Dieu. Et pour ce dist saint Bernart que c'est moult bele chose que humilité avecques virginité plest a Dieu. En celle ame en qui humilité donne los a virginité, virginité embelist humilité. Et, "Je os bien dire," dit il, "que sanz humilité la virginité Marie n'eüst pas plé a Dieu."

La tierce fueille de la fleur de lis, c'est a dire de virginité, est paour de Dieu. Car celles qui seulement vraiment estre vierges, seulement estre paoureuses et vergondeuses, et n'est pas merveille car elles portent moult precieus tresor en moult foible vessiau? Dont la Vierge Marie estoit tous jours reposite et agoit paour quant li anges s'apparut a li. Mes la paour de Dieu si est tresoriere qui garde le tresor de virginité que le dyable d'enfer ne le puisse embler, car elle garde les portes du chastel du cuer ou le tresor²² de virginité est, sont les sens, dons du cors. Ces portes garde la paour de²³

nostre Seigneur que elles ne soient ouvertes a l'anemi par vainne curiosité de veoir ou de oīr ou de parler ou de aler en compagnies souspeçonneuses; car curiosité, especiaument de veoir et d'oīr les vanitez du monde, est souvent voie de luxure. Dont l'en list en l'Escripture que la fille Jacob quant elle ala muser par curiosité de veoir les fames du païs ou elle estoit, elle fu ravie et corrumpue du filz au prince de la terre. Et pour ce qui veult garder virginité il li convient moult retraire ses sens et garder de vaine curiosité. Et ce fet l'en par la sainte paour de nostre Seigneur quant l'en creint tous jours Dieu couroucier. C'est le sens des cinq vierges dont nostre Sires parle en l'Evangille quant il dit que le royaume du ciel est samblabes aus diz vierges, dont les cinq estoient sages et les autres cinq foles. Ilappele ci le royaume du ciel, sainte Eglise, qui est ci aval ou il a adez des bons et des mauvés, et des fols et des sages qui sont membre de sainte Eglise pour la foy que il ont recedu en baptesme. Les cinq sages senefient ceuls qui bien gardent les cinq senz du cors dont nous avons parlé pieça. Les cinq foles²⁴ senefient ceuls qui mauvesement les gardent.

La quarte fueille est asprece de vie, car qui veut bien garder virginité il convient moult bien sa char mater et mettre souz pié par jeuner et par veillier et par ovrer. Asprece de vie est aussi comme une fort haye pour garder le jarding du

cuer que les males bestes, ce sont li anemi, n'i puissent entrer, qui ne beent fors a embler le tresor de virginité. Et pour ce soit estre cis tresors bien clos et bien repost que il ne soit perdus. Car qui le pert il ne puet pas bien recouvrir, ne que une lampe quant elle est brisie ne puet estre derechief enterinee.

La sizieme fueille est perseverance, c'est ferme propos de garder ce que l'en a promis a Dieu. Dont saint Augustin dit ou Livre de virginité et parle aus vierges, "Suivez l'aigniel," fait il, "c'est Jhesucrist en garder fermement ce que vous avez voué a Dieu; faites," dit il, "hardiemment tant comme vous povez que le bien de virginité ne perisse en vous." Vous ne povez chose faire par quoy il retourta vous arriere se vous le perdez, comme nous avons dit de l'essample de la lampe. Et saint Bernart dit. "Estudiez vous en perseverance,
25
elle fole gaaingne la couronne de gloire."

Ces siz fueilles devant dites embelissent moult le lis de virginité mes il convient que ceste fleur ait pardedens trois grains dorez qui senefient trois manieres de Dieu amer. Car virginité sanz amour de Dieu est aussi comme la lampe sanz huille, dont les cinq foles vierges pour ce que elles n'emplirent mie les lampes de ceste huille ne entrent pas avec leur espous aus noces.

Les trois manieres de Dieu amer qui sont senefiees par

les trois grains du lis saint Augustin enseigne quant il dit,
"Ainsi, tu ameras Dieu de tout ton entendement sanz erreur de
toute ta volenté, sanz doutance de toute ta matiere, sans de-
sobeir." En tele maniere est ymage de Dieu parfait en home,
selonc trois dignetez qui sont en l'ame, c'est assavoir en-
tendement, memoire, et volenté. Quant ces trois choses sont
bien ordenees a Dieu en ces trois manieres que dit saint Au-
gustin, lors sont les trois grains du lis bien dorez de leur
charité qui donne biauté et bonté et value a toute vertu, car
sanz ceste vertu nulle n'est devant Dieu ne bele ne precieuse.
Autrement parle saint Bernart de la maniere²⁶ de Dieu amer et
dit os, "Tu, qui es crestien, apren comment tu dois amer Jhe-
sucrist, apren le a amer doucement, sagement, et forment;
doucement que tu ne soies esmeù par prosperité"; sagement que
tu ne soies deceù par niceté; forment que tu ne soies vaincu
par adversité. Ainsi est bele la fleur de virginité quant
elle est tele comme nous avons dit, et c'est la seconde reson
par quoi la fleur de virginité fait homme a loer, et pour sa
bonté et par le profit qui en vient. Car virginité est un
grant tresor et de si grant value que il ne puet estre prisié.
Dont l'Escripture dit que nulle chose n'est digne d'estre que
pensee au cuer chaste, c'est a entendre especiaument de la
chastee de virginité, car virginité sur les autres estas
porte le plus grant fruit. Cil qui sont en mariage et le

gardent si comme il doivent et continuent ont le cinqantime fruit. Cil qui sont en veveté ont le soissantieme. Mes cil qui gardent virginité ont le centieme fruit car ainsi le dit nostre Sires en l'Evangille que la semence qui chai en bonne terre fructefie d'une partie au soissantieme et d'autre partie au centieme.

Ces trois nombres, trente, soissante, et cent appartiennent aus trois estas devant dis. Le nombre de trente, qui est de diz et de trois car trois fois diz sont trente, appartiennent a l'estat de mariage ou l'en doit garder les diz commandemens en la foi de la trinité. Le nombre de soissante qui est plus grant, qui est de siz et de diz, car siz fois diz font soissante, appartiennent a l'estat de veveté car en cest estat l'en doit garder les diz commandemens et avec ce doit l'en faire les siz oevres de misericorde, dont nous avons dessus parlé. Mes le nombre de cent qui est plus grant des trois et plus parfet, car il represente une figure reonde qui est la plus bele et la plus parfaite entre les autres. Car aussi comme en la reonde figure la fin retourne a son commencement et fait aussi comme une couronne aussi le nombre de cent joint la fin au commencement, car diz fois diz si sont une cent, qui senefie la couronne qui les sages vierges couronne.

Et ja soit ce que en l'estat de mariage et en l'estat

de veveté l'en puisse bien gaaingnier la couronne de gloire et plus avoir de merite vers Dieu quē moult de vierges, car moult en y a en paradis de teles qui ont esté en mariage et en veveté, qui plus sont prés de Dieu que moult de vierges. Toutes voies ont les vierges une especial couronne de gloire qui est commune a tous les sains, pour ce que les vierges ont especial victoire de leur char. Car pour suivre l'Aignel, quel part que il voist a qui elles sont espousees, elles ont lessié les noces charnels pour estre avecques lui aus noces pardurables. La seront elles bien parees et noblement appareillees d'un especial parement si gent et si avenant que langue ne porroit descrire; et pour ce n'en vueil je plus dire fors tant comme l'Escripture en dit, qui parle des biens paremens qu'elles ont et plus especiaus que n'ont celles qui sont des autres estas devant dis. Et dit encore l'Escripture qu'elles chantent chançons nouveles si melodieuses et si beles que nul autre ne chantera qui en leur estat ne sera. Ces nouveaus chans qu'elles chantent senefient une nouvele joie et especial loier qu'elles auront pour ce que elles ont bien gardé l'estat de virginité. Et c'est le quint estat de chaasté et la quinte branche de cest arbre.

Le sizieme estat ou l'en doit garder chaasté est de cleric ordené comme sont soudyacre, dyacre, prelat, et prestre. Tuit cil sont tenus a garder chaasté pour deus choses.

Premierement pour l'ordre que il ont receu qui requiert toute
seurte, dont cil sacrement que il reçoivent est si haut et si
saint que il sont si obligé a garder chaasté que il ne se
pueent marier. Aprés, pour l'office que il ont, car il sont
si apropié a Dieu servir en son temple et en son autel, et
traictent et baillent a leurs mains les choses saintefiees,
comme les vessiaus sacrez, les calices, les corporaus, Et
com plus est grant chose sanz comparaison le cors Jhesucrist
que les prestres sacrent et reçoivent a leurs mains et baillent
aus autres. Ore doivent donc estre moult net et moult saint
pour leur douz Seigneur a qui il servent qui est saint, et
het ordure. Dont il dit en l'Escripture, "Soiez saint car je
sui saint."²⁸ Car a tel seigneur, telle mesnie, pour la reson
du lieu ou il servent, c'est le moustier, qui est saint et de-
dié a Dieu servir. L'en trueve que entre les paiens li pres-
tre qui servoient au temple gardoient chaasté et estoient devi-
sé li un des autres que il ne perdisserent.

Chaasté moult doivent estre plus nés sanz comparaison,
et plus chaste li prestre de crestiente qui servent au temple
nostre Seigneur qui est saintefiez et appropriez a Dieu servir.
Encore doivent il estre plus net et plus saint pour ce que il
servent a la table de Dieu de sa coupe et de son pain et de
son vin et de sa viande; la table Dieu, c'est l'autel; sa
coupe, c'est son calice; son pain et son vin, c'est son propre

cors et son propre sanc. Moult doivent donques estre saint
 et net qui tel servise font a Dieu, dont saint Pol dit que il
 convient que li evesque et tuit li autre mestre dont il parle,
 ce sont le menistre de sainte Eglise, soient chaste. Ceste
 chaasté fu senefié en la vielle loy ou Diex commanda a ceuls
 qui devoient mengier l'aignel, qui senefie le cors Jhesucrist,
 que il tenissent bien leurs rains; la çainture que li menistre
 de l'eglise doivent ceindre leurs rains, c'est chaasté qui re-
 straint la lecherie de la char.²⁹ Dont Diex commanda a Aron
 qui estoit prestre et evesque que tuit si enfant fussent vestus
 de cotes linges et ceinz par dessus des cotes blanches de lin.
 Aaron et ses fils qui servoient au tabernacle senefient les
 menistres de l'Eglise qui doivent estre vestus de cotes linges
 de chaasté, qui est senefié par le blanc.

Car aussi comme la touaille de lin a ce que elle soit
 blanche, il la convient moult souvent batre et laver, aussi
 convient il batre sa char par deceplines et par aspreces et
 souvent laver son cuer et purgier des mauvés deliz et des fols
 desiriers par vraie confession a ce que l'en puisse avoir la
 blanche cote de chaasté. Mes ceste coste doit avoir par
 dessus la çainture blanche; c'est a dire que chaasté doit
 estre estroitement gardee et bien restrainte par abstinence
 tant comme reson aperte qui est blanche, ce est la boucle de
 ceste ceinture. Autrement puet l'en dire que la cote linge